

明詩紀事

第十二册

明詩紀事

貴陽陳田輯

丁籤

陶成一首

成字孟學寶應人成化辛卯舉人

圖繪寶鑑續纂孟學自號雲湖仙人畫山水多用青

綠尤喜作鉤勒竹兔與鶴鹿皆妙無聲詩史孟學骯髒不羈有米南宮郭忠恕之風而

豪蕩過之靜志居詩話雲湖寫人物山水最工予嘗從喬侍讀

子靜處見之歎為絕品凌谿其女壻也計偕入都雲

湖語之曰聞張家灣某氏丁香花盛開子盍隨我觀

乎凌谿云去禮部試僅三日公無往雲湖不許明旦

凌谿他避雲湖乘復輿徑去醉主人家五日榜發凌

谿中式比還鄉人醵錢賀凌谿雲湖於席上畫丁香

一本尤妙絕洵曠達之士也

遊白雲觀

珠箔沈沈護曉霞
人間何處有仙家
紫簫吹上瑤臺月
丹氣蒸開玉洞花
一路和風回細草
兩溪新漲浸平沙
遊觀不盡登臨興
引領天門步日斜

豐坊

六首

坊字存禮鄞人嘉靖癸未進士除禮部主事諫大禮受杖改南吏部主事謫通州判官以吏議免坐法竄吳中改名道生字人翁有南禺集

芝園定集南禺質稟靈奇才彰卓詭論事則談鋒橫出摘詞則藻撰立成九流百家罔不涉其津涯七步八義未足誇其捷麗士林擬之鳳毛藝苑方諸逸駟然而性不諧俗行或盤中片語合意輒出肺肝相啗睚眦蒙嗔卽援矛戟交刺亦或譽嫖母爲嬋娟斥蘭荃爲蕢菜旁若無人罕所顧忌知者以爲激詭不知

者以爲誕罔也繇是雌黃間作轉相詆譏出有爭席
之夫居無式閭之敬鵠衣藍縷濕突不炊童奴絕粒
而通亡賓客過門而不入竟頗領以終其身悲夫
藝苑厄言豐道生詩如沙苑馬駑駿相半恣情馳騁
中多敗轍

詹氏小辨南禺外史爲人逸出法紀外而書學極博
五體並能諸家自魏晉以及國朝靡不兼通規矩盡
從手出蓋工於執筆者也以故其書大有腕力特神
韻稍不足

書史會要豐坊草書自晉唐而來無今人一筆態度
唯喜用枯筆乏風韻耳

孫鑛書畫跋跋余生平見南禺草書甚多皆精勁有
古法臨古帖尤妙唐元卿稱爲我朝第一

列朝詩集存禮高才博學下筆數千言立就於十三
經皆別爲訓詁鉤新索累每託名古本或外國本今

所傳石經大學子貢詩傳皆其僞譔也家藏古碑刻
甚富臨摹亂眞爲人譏定法書以眞易贗不可窮詰

爲人狂誕傲僻縱口狗意所至人畏而惡之常要邑
子沈嘉則具盛饌結忘年交相得甚驩或問之曰是

嘗姍笑公詩卽大怒設醺上章詛之上帝所詛凡三
等一等皆公卿大夫有仇隙者二等則布衣文士嘉

則爲首三等鼠蠅蚊蚤虱其狂易可笑皆此類也

甬上耆舊集世廟議崇興獻禮人翁與父學士熙同
哭諫受杖闕下學士旣沒戍所人翁復言其父前諫
大禮非出本意因走京師上書請崇獻皇宜稱宗祀
太廟相嵩主其議上從之然人翁竟不得錄用歸益
自誕放詩深合古法雖時寫牢騷殊未盡其狂也
田按南禺工書於時人中惟文徵仲祝枝山陸子淵
稍見許可而於馬一龍沈愷王逢元陳鶴楊珂沈仕
皆痛詆醜擬不遺餘力其評沈仕書云如夏四倚主
夏四乃時相貴溪幹僕一時氣燄張甚其滑稽玩世
類此余謂南禺以議禮背父附和時局悖甚然於永
陵君也以視當時之趨承貴溪分宜者不稍愈乎詩
亦激宕凌厲寫其牢騷不平之氣才人不得志大抵
類此不足怪也

獨漉篇

上天陰陰雲多風疾風疾尙可雲多蔽日野狐哀鳴求匹于
藪我欲殪之念其無友文彪微繫爪牙無施我心懷憤與之
同悲魚潛在淵不見其形悲歌躑躅孰知我情黃鳥翩翩在

彼江涯凌風一舉燕雀安知

雜詩

孤松挺穹壁下臨萬里波激湍嚙其根驚颿撼其柯紛紛穴
赤蟻裊裊纏青蘿羣攻未云已生意當如何嚴霜一夕墜亭
標復嵯峨君子固窮節感慨成悲歌

病馬行贈少宰何燕泉

路傍病馬棄不收乃是天上眞驂騑君王玄默罷遠遊爾輩
逸氣空橫秋憶昔山西戰爭起嫖姚手提三尺水夜半傳呼
振鐵衣材官十萬同殊死此時銀鞍出塞行甲光一道如流
星宵突重圍忽拉解晨馳厚陣皆奔崩歸來步向丹闕東圍
人太僕俱動容卻疑房宿觸地裂百仞躍出悲泉龍茂陵蕭

蕭土花碧王良旣死誰復惜非關暫蹶損前功端爲一鳴終
見斥陰陰高高入荒昏灑淚不到長安塵日落荒城烏棲背
天明野田霜滿身聞說胡窺白登道邊人被殺如刈草用爾
豈無騰驤力冉冉年華坐垂老出門偶見令我哀買骨誰置
千金臺試問天閑十二駟卽今未必非駑材

清明日

驟雨清明日繁花半欲飛流年兼病長客舍獨春歸東海稀
魚雁西山富蕨薇何當出游衍長此謝陰霏

晚秋遣懷

身世眞相棄清貧久自忘蒼苔緣破屋黃葉滿空牀飯借僧
厨米燈分佛殿光猶餘五經笥一任鬢爲霜

己巳人日卽事

春霧蒙花柳春禽語屋檐絕糧長獨榻避世只空簾藥餌貧
難致文章老更耽亦知立覆瓿千載俟桓譚

王寵

二十首

寵字履仁更字履吉吳人以諸生貢入太學有雅宜

山人集十卷

國寶新編王履吉清夷廉曠與物無競人擬之黃叔
度詩辭刻尙風骨擺脫輕靡陶鎔李杜汰滌情文旣
正體裁復滅蹊徑可謂後來之高足惜乎天不假年
進而未止學士覩其汗血可也行書疏秀出塵頗得

晉法

胥臺集山人詩才力雄闊辭篇麗贍去輕靡而就沈
著尙鋪綴而略陶鎔又白雀諸篇興寄冲立思調清
逸遂窺陶謝之堂幾入王孟之室
甫田集王君風儀玉立舉止軒揭讀書石湖之上偃
息長林豐草間含曛賦詩倚席而歌邈然有千載之

思

續吳先賢讚吳書學自宋克祝允明逮王寵皆名得魏晉法寵所爲詩與文徵明相若而格少尙之

藝苑卮言王履吉詩如鄉少年久遊都會風流詳雅而不盡脫本來面目又似揚州大宴雖鮭珍水陸而時有宿味

四友齋叢說文衡山之後當以王雅宜爲第一蓋其書本於大令兼之人品高曠故神韻超絕迥出諸人之上雅宜詩清警絕倫無一點塵俗氣眞所謂天上謫仙人也所欠者沈著耳

六硯齋筆記王履吉不以畫名偶然興到隨筆點染深得大癡雲林墨外之趣可見高人胸中無所不能無聲詩史雅宜山人書法出入晉唐詩亦清新絕俗作書仿黃子久蒼秀處不減徵仲嘗自題云遠岸疏林斜日外春風碧水草堂前匡廬突兀開屏障坐看銀河一道懸

明詩選李舒章曰履吉風華煒煒自有駿骨陳卧子曰履吉中首山詩追蹤顏光祿

列朝詩集王履吉初學於蔡九達其後遊邊顧之間駁駁改轅而北

明詩別裁履吉圭臬顏謝痕迹未融然爾時吳中詩格以履吉爲最七言律亦頗沈鬱或者必以摹古短

之何也

田按履吉五古步趨顏謝亦時希踪左阮固是吳中俊特其贈邊太常詩云中州兩龍奮東魯一鳳摩傾倒李何與邊至矣牧齋北轅之論是履吉得力處不得以此訾議

還山作

恭承休明日九軌今一家進則綰龜玉退則蟄龍蛇吾道苟
不虧安用事咄嗟山川日閒曠土風頗清嘉躡步陵絕峴流
目玩歸霞鳴嚶靄以豫楊林萸漸花風光枝上汎日采水中
華感物眷彌結悟空理已遐永言詠玄寂聊以遣紛拏

過石公山

島嶼屢崩奔石林突參錯朝雲正吐秀冬水亦漸涸槎牙熊
豹蹲蜷曲蛟龍蟻波濤激中洞嵐靄紛上薄金膏赤日流石

鏡青天鄴表靈徵名圖延賞諧幽諾蒼鼠不驚人丹楓時自落茲焉可投綸畢志甘場藿

入銷夏灣

千山翫迴轉雙闕開嶙峋圍作玉鏡潭流水桃花春雞犬自甲子衣冠乃秦民表裏重湖阻丹青四望勻孤風表日觀羣嶂摩天垠波光別駘蕩霞采相鮮新疑觴西王池誤攀織女津海鷗戲蘭薄游儵瑩心神牙檣悲昔年玉輦罷今巡榮華無常玩山水有天眞塵纓聊以濯慚爾權歌人

曲巖

乘雲歛先登攀崖紛廣眺孤峯上寒日平楚騰餘燒天高風物緊地迴山川竅饑歸仁陸梁哀鴻相叫嘯企石揖雲帆披

霞迎海嶠空水共汎瀾虛無自余照林深養谷神壁仄團景
曜光風爛芝苓玉髓滋蘿鳶樵隱自夷猶末路多奔峭懷哉
冉里公千春可同調

送錢太常元抑祠祭顯陵

江漢朝百靈絳節集鄢郢興國奠其陽虹蜺熠光景象設開
天庭環衛森五嶺齋房產靈芝玉醴出金井神遊駕虛無劍
舄存遺影灑埽祠官虔七鬯皇情耿太常典秩宗精白一心
秉龍顏授玉冊殿上親祇領竝端佩衝牙陟降瑤壇靜風清
靈旗翻天赤御氣罔宗禋日輝光松柏載崇整山河扶棟梁
虎旅肅藩屏還輶告成命弭節爲俄頃備聞古夔龍密布金
華省彷彿弘治風廷論多骨鯁我輩飽藜羹散髮從箕顙

月夜登上方絕頂

乾坤一銀海萬境羣動滅狂殺王子猷疑是山陰雪披襟當
雄風酒後覺耳熱山精忽夜嘯谷響崖竹裂恂恍非人間身
世殊陡絕結束昇天行星斗爲珮玦倒窺山河影嵯峨鏡中
列始知飛仙人五嶽視邱垤紫霧何濛濛入口皆玉屑幾時
丹砂成白日翔鸞節

送陳子齡會試

夙昔卧林壑與子多緒言方軌共行遊遊彼竹素園古人不
可作志節照當年垂爲日星文流爲河漢源中夜撫枕嘆思
與比翼騫龍淵不在握壯志成煩寃日月忽我邁荃蕙甯久
繁努力愛光景及子朝陽瞰鳥飛不厭高獸挺各爭先策足

據要津慰我孤窮魂

分得滕王閣送盧駕部師陳

江漢紀南服衡廬奠朱方河山阻襟帶表裏望荆襄列雉鬱
參錯樹羽盡飛揚風清彭蠡瀨雲起昭邱陽帝子握龍節磐
石荒楚疆中天抗瑤榭倒景垂虹梁鳴鑾謝千載遺構想靈
光夫君勸王事流覽恣方羊霜淒百卉素日落千山蒼悼古
志恟怛遭時氣騰驤北首報明主端笏拱巖廊

渡江望金山

肅舲泝洪濤挂席展奇粵頗懷濟川人復羨臨濠樂茲山絕
地脈江海秀磅礴突起無曼延中流自潏潏太華巨靈擘龍
門神禹鑿嶮峭由代工位置非天作仰干斗牛精俯枕川藪

絡中虛釀靈潤外觀表封略樓宇盡騫騰嵐翠紛沃若潮音
雜鐘梵人語怒蛟鱷余本水鄉士夙負滄洲諾一邱可棲遲
萬事甘零落

飲顧淄川榮夫

昔掌淄川徭今耽竹林賞解龜豈年及乘興非外獎偶會禽
尙心彌肆雲蘿想經始中園廬蘭橑蔭閑敞清波過庭激紫
蔓緣籬上薑芋抽薪萌菰蒲連宿莽差池喧鳥覆灑潏驚魚
響息陰聊舉爵臨涯時抱杖英英白雲游纒纒鮮飈蕩興遠
集蕭晨蘊眞愜吾黨蟬蛻迹已冥鸞翔意俱往方敦塵外交
言稅區中鞅

古意

主父朝上書夕召甘泉宮公孫棄東海歟起如旋蓬王猛三
秦豪賣畚洛城東馬周起徒步驤首虬鬚公達人貴憑化一
蛇而一龍碌碌不玉如落落非石同老氏得其真善應入無
窮長嘯出鼎門高步躡華嵩儻遇王子喬攜手入雲中

天王寺竹林

雅志愛雲竹相看如故人玲瓏動風色瀟灑見天真枕簟開
新夏鶯花追晚春欲將疏懶性一問遠公鄰

晚過竹院

竹院迷青靄祇園橫翠微松門晚霞抱雪壁秋花飛湖迴習
池似臺荒吳苑非蒼蒼暝蘿合還趁漁樵歸

六月十日諸袁攜酒相過

堂上書生據槁梧一樽衰肺覺全蘇從知袁紹逃河朔更賞
王戎戀酒壚涸轍難忘頻煦沫此身無賴祇江湖不妨久坐
論肝腑紅燭淋漓清夜徂

湖夜

水月蒼蒼相蕩摩四天風起碎星河狂來直欲吞雲夢老去
甯辭著芰荷綠酒藏眞時嘯傲青山作伴夜行歌金輿玉座
千年事腸斷吳江東逝波

白龍洞

白龍卧巖洞霧雨長冥冥或化白衣老空山來聽經

春盡

榮華夢想今何在江湖飄零未有涯可惜少年留不得東風